



ԱՌԱՋՆՈՐԴԱՐԱՆ ՀԱՅՈՑ
ՀԻՄՆԻՍԱՅԻՆ ԱՍԵՐԻԿԱՅԻ ԱՐԵՄՍՏԵԱՆ ԹԵՄԻ
WESTERN PRELACY
OF THE ARMENIAN APOSTOLIC CHURCH OF AMERICA
 Archbishop Moushegh Mardirossian, Prelate
 Tel: 818-248-7737/8, Fax: 818-248-7745, E-mail: Prelacy@aol.com



ԸՆԴԱՌԱՋԵԼՈՎ ՎԵՐԱՓՈՒ ՀԱՅՐԱՊԵՏԻ ԿՈՉԻՆ

ԱԶԳԱՅԻՆ ՎԱՐԺԱՐԱՆՆԵՐՈՒ ԱՇԱԿԵՐՏՆԵՐԸ
ՏՈՆԱԿԱՏԱՐԵՑԻՆ ՀԱՅ ԴՊՐՈՑԻ ՏԱՐԻՆ

Հայ Դպրոցի առաքելութեան ու դերին մասին կրնա՞յ ըլլալ անելի պերճախօս արժեւորում ու արտայայտութիւն, քան հանդիսութիւն մը, որ պատրաստուած ըլլայ հայ աշակերտներու կողմէ, որոնք գործնապէս ցոյց տան, թէ իրենք այդ առաքելութիւնը ինչպէս կը մարմնաւորեն ու կը կենսաւորեն:

Ահաւասիկ նման պերճախօս արտայայտութիւն մը եղաւ Արեւմտեան մեր Թեմի Ազգային Վարժարաններու աշակերտութեան հաւաք-հանդիսութիւնը, որ տեղի ունեցաւ Ուրբաթ, 15 Դեկտեմբերի առաւօտուն, Ազգ. Ֆերահեան Երկրդ. Վարժարանի «Աւետիսեան» սրահին մէջ, նուիրուած՝ Հայ Դպրոցի Տարուան: Հանդիսութիւնը տեղի կ'ունենար՝ մեկնելով Մեծի Տանն Կիլիկիոյ Ս. Աթոռի Գահակալ Ն.Ս.Օ.Տ.Տ. Արամ Ա. Կաթողիկոսի հայրապետական այն կողակէն, որ 2006 տարին կը հռչակեր Հայ Դպրոցի Տարի:

Հանդիսութիւնը կը վայելէր Թեմիս բարեխնամ Առաջնորդ Բարձր Տ. Մուշեղ Արք. Մարտիրոսեանի հովանաւորութիւնն ու ներկայութիւնը: Ներկայ էին Հոգեւոր Հայրեր, Ազգային Վարչութեան, Ազգ. Վարժարաններու Խնամակալ Մարմինի ներկայացուցիչներ, Տնօրէններ, դաստիարակներ եւ ծնողներ: Տօնակատարութեան կազմակերպումը յանձն առած էր Խնամակալ Մարմինն ու անոր հովանիին տակ այս առիթով կազմուած յատուկ յանձնախումբ մը, սակայն ամբողջ յայտագիրը պարաստուած էր ու ղեկավարուեցաւ աշակերտներու կողմէ:

Տօնակատարութիւնը սկսաւ ժամը 10:30ին, Ֆերահեան վարժարանի աշակերտներէն՝ Թեմի Իսախանեանի կողմէ արտասանուած աշակերտական ուխտով: Բացման խօսքն ու հանդիսավարութիւնը կատարեց Մերոպեան վարժարանի աշակերտներէն Արագ Հարպոյեան: Սրտի ու գնահատանքի խօսքեր արտասանեցին Ազգային Վարչութեան փոխ ատենապետ Տոքթ. Յակոբ Տէր Մկրտիչեան եւ Խնամակալ Մարմինի ատենապետ Տիար Աւօ Քէշիշեան: Անոնք յիշատակեցին, որ սոյն հանդիսութեամբ, Ազգային Վարժարաններու աշակերտները կ'ընդառաջեն Վեհափառ Հայրապետի կոնդակին, տօնակատարելով Հայ Դպրոցի Տարին, ինչպէս նաեւ վեր առին Հայ Դպրոցի դերն ու առաքելութիւնը՝ հայութեան կեանքին ու հայ նորահաս սերունդներու կազմաւորման մէջ:

Աշակերտութեան անունով ուղերձ արտասանեց Մերոպեան վարժարանի աշակերտներէն Սեւանա Տիմիճեան: Ան գեղեցիկ պատկերով մը բնութագրեց հայ դպրոցն ու անոր կենսունակութիւնը. ան նշեց, թէ Հայ Դպրոցը կը նմանի փիւնիկի,

որ եթե որոշ շրջանի մը մեջ տկարանայ ու գոյութիւն ունենալէ դադրի, ուրիշ տեղ մը կը վերականգնի ու վերանորոգ կենսունակութեամբ կը շարունակէ իր կեանքը:

Պաշտօնական խօսքի բաժիններուն կողքին, պատրաստուած էր նաեւ գեղարուեստական յայտագիր մը. Ալեք Փիլիպոս վարժարանի աշակերտները ներկայացուցին պարային երեք պատկերներ, Ֆերահեան վարժարանի աշակերտները խմբային արտասանութիւններով ներկայացուցին Յայ Դպրոցին նուիրուած բանաստեղծութիւններ, Արի Կիրակոս Մինասեան վարժարանի աշակերտները խմբային արտասանութեամբ ու պատանեկան թատերակով մը արտայայտեցին հայ լեզուին ու հայ ոգիին իրենց հաւատարմութիւնը, իսկ Շամլեան վարժարանի աշակերտական երգչախումբը մասնակցութիւն բերաւ երգերով:

Յայտագիրը ուներ նաեւ յատուկ հիւր մը՝ հայրենի երգիչ Արմէն Մովսէսեանը, որ այս օրերուն Լոս Անճելըս կը գտնուի եւ ընդառաջած էր քանի մը երգով յայտագիրը ճոխացնելու հրաւերին:

ԱՌԱՋՆՈՐԴ ՍՐԲԱՉԱՆԻՆ ՕՐՅՆՈՒԹԵԱՆ ԽՕՍԵԸ

Հանդիսութեան եզրափակիչ խօսքը արտասանեց ու իր պատգամը տուաւ Առաջնորդ Սրբազանը: Ան առաջին հերթին փառք տուաւ Աստուծոյ, որ Ս. Ծննդեան տօնի նախօրեակին, նման գեղեցիկ հանդիսութեան մը առիթը շնորհած է բոլորիս: Ան գոհունակութիւն արտայայտեց ու բարձր գնահատեց աշակերտներուն ու կազմակերպիչ յանձնախումբին տարած աշխատանքը, որ գոհունակութեան ու բաւարարութեան զգացումներով ընկալուած է ժողովականութեան ներկայացուցիչներուն, տնօրէններուն, կրթական մշակներուն ու բոլոր հանդիսականներուն կողմէ: Առաջնորդ Սրբազանը եւս աշակերտներուն յիշեցուց, թէ այս հանդիսութեամբ, իրենք գործնապէս ընդառաջած կ'ըլլան կոչին Վեհափառ Հայրապետին, որուն հետ իրենք տարի մը առաջ հանդիպումի պատմական առիթ մը ունեցան ու անոր եւս հրամցուցին գեղեցիկ յայտագիր մը, ցոյց տալով, թէ Հայ Դպրոցը ինչ կու տայ հայ աշակերտին:

Վեր առնելով հայ դպրոցին դերն ու առաքելութիւնը, Առաջնորդ Սրբազանը ըսաւ. «Սիրելիներ, Հայ Դպրոցը բոլորիս համար երկրորդ տունն է ու երկրորդ հայրենիք, որովհետեւ հոն կը գտնենք մեր ընտանեկան յարկերուն ջերմութիւնն ու գուրգուրանքը, նաեւ ոգեղէն կամուրջ մը մեր հայրենիքին, մեր հոգեւոր ու ազգային ժառանգութեանց ու աւանդներուն հետ: Բանաստեղծներ ու իմաստուն մարդիկ հայ դպրոցը նմանցուցած են լուսատու ջահի, միտք ու հոգի առաջնորդող փարոսի: Այս քանի մը բառերը իրենց մէջ կը խտացնեն Հայ Դպրոցին իմաստն ու իւրայատկութիւնը, այսինքն՝ տարբերութիւնները ուրիշ, օտար դպրոցներէն, որովհետեւ, սիրելիներ, միայն հայ դպրոցն է որ ձեզի կը սորվեցնէ մեր լեզուն, մեր պատմութիւնը, մեր մշակութային արժէքներուն կը ծանօթացնէ ձեզ: Ձեր այսօրուան հանդէսը, արդէն գործնական փաստ մըն է այս իրականութեան:

«Ճիշդ է, որ այսօրուան հանդիսութիւնը Հայ Դպրոցին նուիրուած այս տարուան վերջին պաշտօնական տօնակատարութիւնն է, սակայն այս ոգին ու պատգամը վերջ պիտի չգտնէ 2006 տարուան հետ, որովհետեւ, ըսեմ ձեզի, Վեհափառ Հայրապետը 2007 տարին նուիրած է Հայ Լեզուին: Հայ լեզուն, Հայ Մշակոյթը անբաժանելի արժէքներ են ու մաս կը կազմեն Հայ Դպրոց գաղափարին: Ուրեմն, մեր դպրոցներուն համար յառաջիկայ տարին պիտի ըլլայ ուղղակի

շարունակութիւնը այսօրուան տօնակատարութեան ու անոր խորհուրդին, ու մենք միասնաբար պիտի շարունակենք ապրիլ մեր դպրոցներու հայաշունչ մթնոլորտին մէջ: Եւ ինչպէս ըրինք 2006 տարուան ընթացքին, եկեք, յառաջիկայ տարի եւս միասնաբար, այսպիսի գեղեցիկ գործակցութեամբ տօնակատարենք Հայ Լեզուի Տարին: Ձեր դպրոցներուն մէջ, առանձնաբար, կամ այսպիսի միացեալ տօնակատարութեամբ, աշակերտ եւ ուսուցիչ, տնօրէններ ու ծնողներ գործակցինք մեր լեզուի արժէքը պանծացնող հանդիսութիւններ կազմակերպելու մէջ»:

Առաջնորդ Սրբազանը իր խօսքը եզրափակեց յիշեցնելով, որ քանի մը շաբաթէն քրիստոնեայ աշխարհը պիտի տօնէ Ամանորն ու Քրիստոսի Ս. Ծնունդը, հետեւաբար, ան բարիք մաղթեց բոլորին ու թելադրեց, որ տօնական այդ օրերը բոլորին սիրտները լեցնէ սիրով ու հաճութեամբ:

Հանդիսութիւնը վերջ գտաւ Առաջնորդ Սրբազան Հօր «Պահպանիչ» աղօթքով եւ «Կիլիկիա» խմբերգով, զոր կատարեց Շամլեան վարժարանի երգչախումբը: